

Formasaun descentralizadu mak hadi'a servisu justisa

Baucau – Ofisiál Justisa Tribunal nain-56 iha Timor laran tomak mak partisipa iha programa formasaun ne'ebé kontein teórika, prátika no aprende durante servisu. Inisiativa ida ne'e, ne'ebé dezeñu atu hasa'e efikásia no efisiénsia husi servisu justisa, lori formador sira ba servisu-fatin ofisiál sira no permiti funsionamentu normal husi Tribunal sira no kontinua atu klarifika dúvida kona-ba tópiku sira ne'ebé tama iha treinamentu.

“Atu iha formadór sira ne'ebé mai iha ne'e diak tebes, atu nune'e ami bele hala'o ami-nia atividade no, aleinde ne'e, atu simu apoiu iha parte ne'ebé mosu duvída” Martinha da Costa dehan, Ofisiál Justisa iha Tribunal Distritu Baucau.

Ida ne'e mak programa formasaun sistematizadu primeiru ne'ebé mak liuliu kria ba funsionáriu tribunál sira. Tópiku husi formasaun mak hanesan étika, estatística, inventáriu, estatutu ofisiál, penál no prosesu krime sira, ne'ebé mak define liu-husi avaliasaun ba nesesidade komprensivu nian, no haforsa liu husi hadi'a prosedimentu iha sistema tomak ne'ebé kria atu aseguara konsisténsia husi implementasaun iha distritu judisiál hotu-hotu. Importante liu katak, formasaun ne'e fó apoiu ba implementasaun husi sistema jestaun kazu eletróniku.

Iha Distritu Baucau, hamutuk Ofisial Justisa 12 mak servisu no sira kontente ho formasaun ne'e, no fiar katak formasaun ne'e sei fó impaktu boot wainhira sistema jestaun kazu eletróniku ne'ebé mak atu hahú implementa hanesan teste ka pilotu iha fulan Marsu tuir-mai la'o.

“Mudansa sira ne'e sei fasilita ami-nia servisu, aselera prosesa despaixu Tribunal nian no permiti rezolusaun ba kazu ida ne'ebé lais”, dehan Ermelinda Seixas, servisu iha Seksaun Sivil.

“Ho sistema jestaun kazu, sei fásil-liu atu organiza no monitoriza ami-nia servisu, no nune'e atu hadi'a servisu ne'ebé ami fó”, dehan Sebastião Soares, Sekretáriu Tribunal Distritu Baucau.

Formasaun ida ne'e, ne'ebé hahú iha fulan Setembru 2013 no sei remata iha fulan Juñu 2014, hetan apoiu husi UNDP Programa ba Sistema Justisa (JSP). Funsionáriu sira ne'ebé iha esperiénsia bo'ot no sira ne'ebé mak foin hahú servisu iha tribunal hanorin la hanesan, tuir sira-nia abilidade, maibé hotu-hotu sei hetan formasaun klean iha sistema jestaun kazu eletróniku. Iha klase balun mak kahur funsionáriu sira ne'ebé iha esperiénsia-liu hanesan Martinha, ne'ebé hahú servisu iha sistema justisa nian bainhira instituisaun Estadu sira estabelese iha tinan 2000, ho funsionáriu foun hanesan Emelita, ne'ebé sai nu'udar Ofisiál Justisa iha Tribunal dezde Agostu 2012, hodi fó korajen ba partisipante sira atu fahe koñesimentu no insentiva sira atu fó apoiu ba malu. Formasaun ida ne'e mós haforsa liu husi manuál referénsia ne'ebé fahe ba funsionáriu sira.



Empowered lives.
Resilient nations.

Liu-husi iniciativa ida ne'e, JSP ajuda atu lori mudansa transformasionál iha funcionamentu husi sistema justisa aleinde nível sentrá. Liu-husi habelar possibilidade formasaun ne'ebé eziste aleinde Dili, impaktu signifikativu bele halo atu hasa'e efikásia no efisiénsia husi servisu justisa iha nível lokál sira. Aleinde ne'e, husi harii kapasidade nivel lokál, iniciativa ne'e mós fó apoiu ba kuadru descentralizasaun nian.

Programa formasaun ne'e bele hala'o liu husi subsídiu US\$ 500,000 husi *UNDP's Regional Bureau for Asia and Pacific*.

Destaka

Programa formasaun sistematizadu kria espesífiku ba funcionáriu Tribunal sira dahuluk hala'o agora daudaun ho Ofisiál Justisa no Administradir nain-56 husi distritu judisiál Timor-Leste nian hotu, no kontein teoria, prátika no aprende durante hala'o servisu.

Programa formasaun ne'e, ne'ebé haforsa liu husi hadi'a prosedimentu iha sistema tomak no implementasaun husi sistema jestaun kazu eletróniku ida, ho objetivu atu hasa'e efikásia no efisiénsia husi servisu justisa nian iha nasaun ne'e.